

DOMENIE XXV «VIE PAL AN»

Jutoris pe Liturgjie

Domenie, ai 22 di Setembar dal 2019

Di domenie in domenie il Signôr nus condûs cun bontât e pazience e, come che lui al sa, nus done la sô sapience semplice e umane in cheste societât avanzade, tecnocratiche e multimediâl che par mût di dî e sa dut tal zîr di un secont. Ma cence Signôr i mancje la perle di grant valôr: l'umamitât di Gjesù (Cf. Mt 13, 46). La parabule di vuê e cjacare di: un gastalt - un aministradôr dai bens dal paron. Il gastalt - l'aministradôr o sin cence ecezion ognun di noaltris rivâts in chest mont crots di dut e duncje parons di nuie. Noaltris o vin dome di ministrâ i bens che o vin cjatât e che a son dal Creadôr, dal Altri.

O vin di tornâ cun umiltât e modestie al nestri puest: nissun stât o guviâr, nissune multinazionâl o specialist di marketing a puedin decidi di tramudâ la tiere, l' aiar, l' aghe o il teritori dal Friûl, dal Congo, de Groenlandie, de Amazonie in profit cence etiche.

Cheste e je la prime sapience de parabule di vuê: l'om al è aministradôr, no paron: une veretât che i potents le ridin e intant a distruzin l'ecosistemi e la vite de nestre mari tiere. Al è ce che al sta sucedint.

... di cumò indenant no tu podarâs plui ministrâ. Chest befêl, tant o pôc, nus ven a ducj parcè che ducj cui plui cui mancûl o fasin di parons de nestre vite, o tentin di paronâ su chei altris e te nestre societât "usa e getta" o violentin la tiere plui che volêi ben.

Se dopo chestis veretâts, o zontin come coment al profete Amos (prime leture) l'incuinament gjeneralizât a ogni nivel di vuê alore o sin za cu lis orelis bassis te nestre vere posizion, chê dal publican che si fermà lontan e nol olsave nancje a alçâ i vôi viers dal cîl, ma si bateve il pet e al diseve: Diu, ve remission di me, pecjadôr (cf. Lc 18, 9-14).

Antifone di jentrade

Jo o soi la salvece dal gno popul, al dîs il Signôr.
In cualunche tribulazion mi clamaran,
jo ju scoltarai e o sarai il lôr Signôr par simpri.

Colete

Diu, che tu âs fondade dute la tô sante leç
sul amôr par te e pai fradis,
danus la gracie di meti in vore i tiei comandaments
par podê rivâ a la vite eterne.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Am 8,4-7

Cuintri chei ch'a comprin i puars cul arint.

O sin te seconde metât dal secul VIII p.d.C.; al regne Gjeroboam II e in Israel fra comerci, aleancis e concordâts economics i grançj proprietris cence pêl di cussience si sigurin riecece, sigurece e baldorie. Disgraciâts! A vivin tal lusso comprant i biâts cul arint e il puar par un pâr di sandui.

Plui o scoltin dongje dai puars chest toc e plui la imoralitât di chei nemâi nus fâs revoc.

Però: o podin dî che la tragjediè umane presentade di Amos, “a son rosis e flôrs” se metude a confront cui disastros fûr di ogni limit de economie globâl tal mont di vuê.

Dal libri dal profete Amos

Scoltâit cheste, vualtris ch’o tibiais il puar
fint a fâ sparî i piçui de tiere,
disint: «Cuant passarae la lune gnove
par podê vendi il forment,
e la sabide, par podê puartâ fûr il forment,
scurtant lis misuris e ingrandint il siclo
e doprant staderiis falsis,
comprant i biâts cul arint
e il puar par un pâ di sandui,
par podê vendi ancje il scart dal forment?»
Il Signôr al à zurât pe supierbie di Jacop:
No dismentearai fin tal ultin
nissune des vuestris voris.
Peraule di Diu.

SALM RESPONSORIÂL

dal Salm 112

*No stin a ripeti chest ritornel dongje di chei che a stan ben e no àn fastidis di sorte; o vin di ripetilu cun Gjesù che nol à dulà poia il cjaf (Mt 8, 20) e cui tribulâts che o cognossin e che no àn lusôr di sorte. Dome li chest ritornel al cjape il so just puest e savôr.
Se no, al è miôr patafâsi la bocje.*

R. Il voli dal Signôr al è parsore dal puar.

Se cjantât: Il cjant dai salms responsoriâi, p. 251.

Laudait, fameis dal Signôr,
laudait il non dal Signôr.
Il non dal Signôr ch’al sedi benedît,
cumò e par simpri. **R.**

Il Signôr al è il plui alt, sore ducj i popui;
plui alte inmò dai cî e je la sô glorie.
Cui esal compagn dal Signôr nestri Diu,
che lassù adalt si sente
e che a cjâlâ jù si plee sui cî e su la tiere? **R.**

Dal pulvin al tire sù il misar,
e il puar dal ledan al jeve,
par fâlu sentâ cui princips,
cui prins dal so popul. **R.**

SECONDE LETURE

1 Tm 2,1-8

Che si fasin preieris par ducj i oms a Diu ch’al vûl che ducj si salvin.

Nô o acetin vultintîr la raccomandazion de letare di fa prejeris pai presidents dai stâts e par ducj chei ch’a son in autoritât, dome che si domandin te politiche taliane e globâl che o assistin, di ce bande e par cui començâ. Culî nol è di preâ par judâ a migliorâ ma par domandâ il miracul di personis dal dut gnovis che a metin come fonde une responsabilitât etiche: No podês servî a Diu e al bêç.

De prime letare di san Pauli apuestul a Timoteo

Benedet, ti racomandi, prin di dut, che si fasin suplichis, preieris, intercessions e ringraziaments par ducj i oms, pai rês e par ducj chei ch'a son in autoritât, par ch'o podin vivi une vite cuiete e serene, cun dute la religjon e il rispjet. Di fat cheste e je une robe biele e che i plâs a Diu nestri salvadôr, ch'al vûl che ducj i oms si salvin e a rivin a la cognossince de veretât. Di fat Diu al è un sôl e ancje il mediatôr fra Diu e i oms al è un sôl, l'om Crist Gjesù, che si è dât vie par riscatâ ducj. Cheste testemoneance lui le à dade tai tims stabilîts, e jo o soi stât metût so aralt e apuestul – o stoi disint la veretât e no conti bausiis –, mestri dai paians te fede e te veretât.

Par chel o vuei che i oms a prein pardut, alçant viers il cîl mans mondis, cence rabie e spirt di contradizion.

Peraule di Diu.

CJANT AL VANZELI

cf. 2 Cor 8,9

R. Aleluia, aleluia.

Gjesù Crist, di siôr ch'al jere, si è fat puar, par ch'o diventassin siôrs in grazie de sô puaretât.

R. Aleluia.

VANZELI

Lc 16,1-13

No podês servî a Diu e al bêç.

La "peraule - clâf" de parabule e je: Il paron, il Signôr, al laudà chel gastalt dionest, parcè che al veve savût messedâsi di furbo e il signiicât al è: doprait lis vuestris cualitâts, dons e se o vês furtunis par judâ chei che e son tes necessitâts. Dome cussì tu podarâs sedi laudât come furbo. La parabule e conclût visant: Fasêtsi amîs cu la ricjece ingrumade malamentri, par che, cuant che us vignarà a mancjà, us acetin tes tendis eternis. I amîs a son i tribulâts che tu âs judât: lôr ti daran une man cuant che lassât chest mont tu restarâs crot di dut.

Il pinsîr di nestri Signôr al è plui che clâr e di une sapience, l'uniche, che e segne no dome la nestre salvece personâl, ma e pues donâ un avignî te aministrazion de economie dal mont, pal moment: cence un sens.

Dal vanzeli seont Luche

In chê volte, Gjesù ur diseve ai dissepui: «Un om siôr al veve un gastalt e chel al fo incolpât denant di lui di vêi sassinate dute la sô robe. Il paron lu clamà e i disè: Esal vêr ce ch'o sint a dî di te? Rint cont de tô ministrazion parcè che di cumò indenant no tu podarâs plui ministrâ. Il gastalt al disè dentri di se: Ce aio di metimi a fâ cumò che il gno paron mi à gjavade la ministrazion? A sapâ no ai fuarce e a cirî la caritât no mi trai il cûr. O sai ben jo ce ch'o fasarai, par che, cuant che mi varan gjavade la ministrazion, mi acetin in cjase lôr. Al clamà un par un chei ch'a vevin debits cul so paron e i disè al prin: Tu, trop âstu di dâi al gno paron? Chel i rispuindè: Cent misuris di vueli. I disè: Cjape la tô cjarte, sentiti e segne cincuante. Po i disè a di un altri: E tu, trop âstu di dâi? Chel i rispuindè: Cent misuris di forment. I disè: Cjape la tô cjarte e segne otante. Il paron al laudà chel gastalt dionest, parcè che al veve savût messedâsi di furbo. Di fat i fis di chest mont, tal tratâ cun chei de lôr stesse paste, a son plui svelts che no i fis de lûs.

E jo us dîs:

Fasêtsi amîs cu la ricjece ingrumade malamentri, par che, cuant che us vignarà a mancjà, us acetin tes tendis eternis.

Chel ch'al è fedêl tes robis piçulis, al è fedêl ancje tes robis impuartantis; e chel ch'al è dionest tes robis piçulis, al è dionest ancje tes robis impuartantis.

Pa la cuâl, se no sês stâts fedêi te ricjece sbalgjade, cui si fidaraial di dâus chê vere? E se no sês stâts fedêi te ricjece di chei altris, cui us daraial la vuestre?

Nissun nol pò servî doi parons: o ch'al odearà un e i volarà ben a di chel altri o ch'al varà miôr un e nancje nol cjalarà chel altri. No podês servî a Diu e al bêç».

Peraule dal Signôr.

Su lis ufiertis

Acete vultîr, Signôr, i regâi dal to popul,
par ch'al puedi vê, cui sacraments dal cîl,
ce ch'al professe cu la devozion de fede.
Par Crist nestri Signôr.

Antifone a la comunion

Sal 118,4-5

Tu tu âs dât ordin, Signôr, che i tiei decrets a sedin metûts ben in vore.
Ch'a sedin sigûrs i miei trois
par ch'o puedi meti in vore i tiei ordins.

Daspò de comunion

Compagne simpri, Signôr, cul to jutori
chei che tu ristoris cui tiei sacraments,
par ch'o podin sintî i efîets de redenzie
tai misteris e te vite.
Par Crist nestri Signôr.

* * *

Cjants

*Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62
comprendût.*

* * *

Tant tant piês che ai tims dal profete Amos

45. *“Probabilmente i popoli originari dell'Amazzonia non sono mai stati tanto minacciati nei loro territori come lo sono ora” (Fr.PM). I progetti estrattivi, agricoli o di allevamento che sfruttano sconsideratamente la terra stanno distruggendo questo territorio (cf. LS 4, 146), che corre il rischio di “savanizzazione”.^[18] L'Amazzonia è oggetto di contesa su più fronti. Uno risponde ai grandi interessi economici, avidi di petrolio, gas, legno, oro, monoculture agro-industriali, ecc. Un altro è quello di un conservatorismo ecologico che si preoccupa del bioma ma ignora i popoli amazzonici. Entrambi producono ferite alla terra e alle sue popolazioni: “Siamo colpiti da commercianti di legname, allevatori di bestiame e altre parti terze. Minacciati da attori economici che implementano un modello estraneo ai nostri territori. Le imprese forestali entrano nel territorio per sfruttare la foresta, noi abbiamo cura della foresta per i nostri figli, abbiamo carne, pesce, farmaci vegetali, alberi da frutto [...]. La costruzione di impianti idroelettrici e il progetto dei corsi d'acqua ha un impatto sul fiume e sui territori [...]. Siamo una regione di territori rubati.”^[19]*

46. *Secondo le consultazioni effettuate, le grida amazzoniche riflettono tre grandi cause di dolore: (a) la mancanza di riconoscimento, demarcazione e titolarità dei territori degli indigeni, che sono parte integrante della loro vita; (b) l'invasione dei grandi progetti chiamati di “sviluppo”, ma che in realtà distruggono territori e popoli (es. impianti idroelettrici, estrazione mineraria - legale e illegale - associata ai garimpeiros illegali [minatori informali che estraggono oro], idrovie - che minacciano i principali affluenti del Rio delle Amazzoni -, attività idrocarbonifere, attività zootecniche, deforestazione, monocultura, agroindustria e grilagem [appropriazione indebita di terre avvalendosi di documentazione falsa]. Molti di questi progetti distruttivi in nome del progresso sono sostenuti da governi locali, nazionali e stranieri; e (c) l'inquinamento dei fiumi, dell'aria, dei suoli, delle foreste e il deterioramento della qualità della vita, delle culture e delle spiritualità. Ecco perché “oggi non possiamo fare a meno di riconoscere che un vero approccio ecologico diventa sempre un approccio sociale, che deve integrare la giustizia nelle discussioni sull'ambiente, per ascoltare tanto il grido della terra quanto il grido dei poveri” (LS 49).*

Questo è ciò che Papa Francesco chiama ecologia integrale.

Sinodo dei vescovi per la Regione panamazzonica - Instrumentum laboris.

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrîvêt a info@glesiefurlane.org*